

**Uunga siunnersuut: Aningaasarsianit akileraarutit pillugit Inatsisartut inatsisaata allangortinneqarneranik Inatsisartut inatsisaat nr. xx, xx. xxx 2019-imeersoq**  
*Aningaasaqarnermit Nunanilu Avannarlerni Suleqatigiinnermut Naalakkersuisunit saqqummiunneqartoq*

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutip pingajussaaneerpeqarneranut**

**ILASSUTITUT ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Hermann Berthelsen, Siumut, siulittaasoq  
Inatsisartunut ilaasortaq Peter Olsen, Inuit Ataqtigiit, siulittaasup tullia  
Inatsisartunut ilaasortaq Karl-Kristian Kruse, Siumut  
Inatsisartunut ilaasortaq Henrik Fleischer, Siumut  
Inatsisartunut ilaasortaq Múte B. Egede, Inuit Ataqtigiit  
Inatsisartunut ilaasortaq Malene V. Rasmussen, Demokraatit  
Inatsisartunut ilaasortaq Jens NapátôK', Partii Naleraq

**Immikkoortoq ataatsimiititaliap qinnuiginninneratigut aappassaaneerinninnermi ataatsimiititaliamut innersuunneqaqqippoq.**

Siunnersuutip Aningaasaqarnermut Akileraartarnermullu Ataatsimiititaliamit suliareqqinneqartussanngorlugu innersuunneqarnerata kingorna Naalakkersuisut aappassaaneerinninnissamut akissuteqaataata sukumiinerusumik misissornissaa ataatsimiititaliamit periarfissaqarfigineqarpoq. Tassunga atatillugu erseqqissaatigineqassaaq akissuteqaat taanna inatsisissatut siunnersuummik aappassaaneerinninnissaaq sioqqutitsiarlugu aatsaat saqqummersimammat, taamaalillutillu Inatsisartunut ilaasortat taassuminnga isummerfiginninnissaminnut periarfissaat killerujussuusimavoq. Taamaattumillu tamatumani paasissutissat nutaat ataatsimiititaliamit ilisimaneqalersut samminissaat ataatsimiititaliamit immikkut pisariaqartinneqarsimavoq.

Ataatsimiititaliami amerlanerussuteqartut Siumumeersut Demokraatineersullu ima oqaaseqaateqarumapput:

”Naalakkersuisut akissuteqaataanni takuneqarsinnaasutut Akileraartarnermut Aqutsisoqarfiup nalilerpaa IT atorlugu systemit, maannakkumut akileraartarnikkut aaqqissuussinermi qaammatikkaartumik sulinermut ilanngaatiq ulloq 1. januar 2021 aallarnerfigalugu akiliuteqartalernissamut kinguneqartussanut, ineriartortinneqarnissaannut atuutilernissaannullu aningaasartuutit 12-15 mio. kr.-it missaanniissasut. Taakkua saniatigut Akileraartarnermut Aqutsisoqarfiup missingersorpaa ingerlatsinermut aningaasartuutit ukiumut 5 mio. kr.-it missaanni annertuseriassasut aaqqissuussinerup malitsigisaanik sulisunik immikkorluinnaq ilisimasalinnik atorfinitsitsisoqartariaqarmat. Missingiutit taakku nikerangaatsiarsinnaapput.

Namminersorlutik Oqartussani kommuninilu, minnerunngitsumik Akileraartarnermut Aqutsisoqarfiup ataani, IT atorlugu suliniutit annertuut piffissami kingullermi aallartisarneqarsimanerat ataatsimiititaliami amerlanerussuteqartut maluginiarpaat. Tassani ilaatigut pineqarput aningaasatigut aqutsinermut systemi nutaaq, pisariillisaanermi suliniutit ERP-tut taagorneqartoq, Ilanngaassiviup systemissaa, pisortani digitalimik allagarsiivik, nemkonto aamma akissarsialerissut systemi nutaaq.

Ataatsimiititaliamit amerlanerussuteqartut pitsaalluinnartutut pisariaqartutullu isigaat pisortani ingerlatsinerup nutarterneqarnera, minnerunngitsumik akileraartarnikkut aammalu IT-p tungaatigut. Taamaattoq aamma IT atorlugu akileraartarnikkut suliniutit maannakkorpiq aallarnisarneqartut ilumut piviusorsiornersut aperisariaqarpugut. Akileraartarnikkut isertitat Namminersorlutik Oqartussani kommuninilu isertitaqaatit annersaraat, aamma tamanna pisortani ingerlatsinermut, minnerunngitsumillu innuttaasunut, sunniuteqarluinnarpoq tamanna isumannaalluinnartumik eqqortumillu aqunneqarnerseq qulakkiissallugu. Ataatsimiititaliap pingaartilluinnarpaa nunatsinni akileraartarnerup pitsaasumik aqunneqarluartumillu systemeqarluni ingerlanneqarnissaa.

Tamanna aallaavigalugu oqaatigineqareersutuut amerlanerussuteqartut isumaliutigisariaqarpaat ilumut taamak annertutigisumik maannakkoqqissaaq Akileraartarnermut Aqutsisoqarfimmi IT pillugu suliniummik aallartitsisoqarnissaa pissusissamisoornersaq. Tassunga atatillugu Naalakkersuisut akissuteqaataanni paasissutissat nutaat saqqummiunneqartut nalilersorneqarput. Paasissutissat taakku aallaavigalugit maannakkut taamak annertutigisumik aammalu IT atorlugu suliniummik, qaammatikkaartumik sulinermut ilanngaammik qaammatikkaartumik tunniunneqartussamik IT atorlugu aaqqiissutissamik ineriartortitsinissamik, ilisimaneqaqqissaanngitsumik aallartitsisoqarnissaa Akileraartarnermut Aqutsisoqarfiup sulisoqarnikkut aningaasatigullu toqqiissimaffiginngikkaa. Tassani aamma ilanngullugu isigineqartariaqarpoq ataatsimiititaliap arlaleriarluni paasisimagaa IT atorlugu suliniutit ilimagineqaqqaartumiit akisuneruleratarsinnaallutillu annertunerujussuusinnaasarmata.

Tamanna toqqammavigalugu amerlanerussuteqartut isumaqarput sulinermut ilanngaatiip ukiumoortumik tunniunneqartarnissaa inooqataaffigineqarsinnaasoq. Amerlanerussuteqartut taamaattoq sakkortuumik piumasarisavaat Naalakkersuisut, ataatsimiititaliap kissaateqarneratut, qaammatikkaartumik naatsorsuisinnaasumik akileraartarnikkut systemimik nutarterinissamut suliaq sapinngisamik piaartumik aqutissiuunniarlugu sinnaakutissanik piviusorsioortunik suliaqaqqullugit.”

Ataatsimiititaliami ikinnerussuteqartut Inuit Ataqtigiiinneersut Partii Naleqqameersullu ima oqaaseqaateqarumapput:

”Ataatsimiititaliami ikinnerussuteqartunit isertuunneqanngilaq iliuusissat inuiaqatigiit aningaasaqarnerannut taamatullu inunnut ataasiakkaanut iluaqutissartaqartutut uppersarneqarsinnaasut atuutilersinneqarnissaat kissaatigigipput.

Tamannali paasissutissanik piviusunik tunngaveqassaaq, taamaaliornikkut toqorterlugit inuttaasunut akiligassanngortitsisoqaqqunagu tamatumani tunngavigineqassanatik qununerarluta sapiiserpalaartumik oqariartorerit.

Inuit allat aningaasaataat pillugit “sapiisernissaq” ajornaatsuararsuuvoq, taamaattumillu isumaqarpugut pisortat aningaasaataat pineqartillugit inuusuttuunerup nukinga inuunermik misilittakkat tunngavigalugit ilisimassusermut ataqtigiiissineqassaaq.

Sulinerut ilanngaammik atuutilersitsinissamut tunngatillugu oqaatigaarput tamanna eqqortumik periuseqarluni ingerlanneqartariaqartoq, taamaaliornikkut inuiaqatigiinnut ataasiakkaanullu pitsaasumik sunniuteqarsinnaasunngorlugu. Tamatumani sakkussat, tassungalu ilanngullugu qarasaasiakkut aqutsisutit eqqortut, sulinermut ilanngaammik ataasiakkaanut ingerlaavartumik iluaqutaasinnaasumik atuutsitsilernissamut tapertaasut, pigineqarnissaasa qulakkeerneqarnissaa pisariaqarpoq.

Sulinermut ilanngaatiip atuutilersinneqarnerata sunniuteqarluarsinnaanissaanik qulakkeerrinnissamut qaammatikkaartumik tunniussisarnissaa pingaaruteqarpoq, soorlutaaq allaffissornerulernermik nassataqaqqunagu sakkussat eqqortut pigineqareernissaasa qulakkeerneqarnissaa pingaaruteqartoq. Tamannalu amerlanerussuteqartut sulinermut ilanngaammik atuutilersitsinissamik kissaataannit maanna peerneqarluinnarpoq. Tamatuma peqatigisaanik ingerlatseqatigiiffiit qaffasinnerusumik akileraarnerisigut sunniutissaa atorunnaarsinneqarpoq, tassami tamatuma peqatigisaanik nalunaarutigineqarmat taakku akileraarutaat appartinneqartoq.

Taamaaliornikkut sulinermut ilanngaammik pisariitsumik ilusiliinissaaq tunngavigineqartariaqartoq saneqqunneqarpoq aammalu sulinerup kingorna ukiup ataatsip affallu qaangiunnerani 4.000 kr.-it sinnilaarlugit tunniunneqarnerisigut pitsaasumik sunniuteqarnissaa naatsorsuutigissallugu piffissaatillugu iliuuseqarnertut

isigineqarsinnaannginnerarlugu Aningaasaqarnermut Siunnersuisoqatigiit suliallillu oqarnerat eqqortuunerartariaqarparput.

Aqutseriaatsinik sulinermit ilanngaammik qaammatikkaartumik tunniussinissamik isumaginnissinnaasunik piffissami qaninnermi atuutilersitsisoqarsinnaanngitsoq Naalakkersuisunit taamatullu amerlanerussuteqartunit maanna nassuerutigineqarsorinarmat ataatsimiititaliami amerlanerussuteqartut siunnersuutaat akuerineqassappat kingunerisassat allaffissornerup annertunerulerneranik nassataqartut ataatsimiititaliami ikinnerussuteqartunit akerlerineqarput.

Siuliani allassimasunik tunngavilersuuteqarlutik ataatsimiititaliami ikinnerussuteqartut aappassaaneerinninnissamut isumaliutissiisummi aammalu aappassaaneerinninnissamut ilassutitut isumaliutissiisummi isummernertik aalajangiusimavaat.”

#### **Ataatsimiititaliap inassuteqaatai**


**Ataatsimiititaliami amerlanerussuteqartut** Siumumeersut Demokraatineersullu siunnersuut **akuersissutigineqassasoq** inassutigaaat.

Siuliani allassimasunik tunngavilersuuteqarlutik **ataatsimiititaliami ikinnerussuteqartut** Inuit Ataqtigiinneersut Partii Naleqqameersullu siunnersuut **itigartinneqassasoq**.

Taama oqaaseqarluni isumaliutissiisummilu allassimasunik oqaaseqaateqarluni ataatsimiititaliap siunnersuut pingajussaaniigassanngortippaa.



Hermann Berthelsen  
Siulittaasoq



Peter Olsen  
Siulittaasup tullia




Karl-Kristian Kruse




Henrik Fleischer



Malene V. Rasmussen



Jens Napaattoq



Múte Bourup Egede